



李嶠集卷上

賦

楚望賦

序曰登高能賦謂感物造端者也夫情以物感而
心由目暢非歷覽無以寄杼軸之懷非高遠無以
開沉鬱之緒是以騷人發興於臨水柱史詮妙於
登臺不其然歟蓋人稟性情是生哀樂思必深而
深必怨望必遠而遠必傷千里開年且悲春日一
葉早落足動秋襟坦蕩忘情臨大川而永昔憂喜
在色陟崇岡以累歎故惜逝憫時思深之怨也搖



情蕩慮望遠之傷也遠則感遙而悼近怨則戀始而悲終遠節弘人且遊軫念苦心志士其能遺懷是知青山之顛每多惆悵之客白蘋之野斯見不平之人良有以也余少歷艱虞晚就推擇揚子甘泉之歲潘生秋興之年曾無侍從之榮顧有池籠之嘆而行藏莫寄心跡罕并歲月推遷志事遼落栖遑卑辱之地窘束文墨之間以此爲心心可知矣楚北有山者即禹貢所謂岐東之荆也岿堯高敞可以遠望余簿領之暇蓋嘗遊斯俯鏡八川周睇萬里悠悠失鄉縣處處盡雲烟不知悲之所集

也歲聿云暮遊子多懷援筆慨然遂爲賦云爾
眇乎忽焉高山之顛露團團而濕草風烈烈而鳴
泉對蒼茫之寒日聽蕭索之悲蟬 獨處而無晤
吾凝睇乎八埏於是繁懷載紆積慮未豁生遠情
於地表起遙恨於天末霜盡川長雲平野闊恨遊
襟之浩蕩憤羈怨之忉怛寐焉長想倏若有亡固
將言而已歎信無哀而自傷撫余情之增軫悼人
事之多戚曾浮促之幾何而思諸之纏邈思何憂
而不入心何慮而不攢雜感目之一致終寄懷而
百端若乃平原杳兮千 春青山遠兮萬里親迷

故鄉之處所減愛舊之
年塵願寄言而靡託思假
翼而無因徒極睇而盡思終天性而傷神或復天
高朔漠氣冷河關漢塞鴻度吳宮鸞還對落葉之
驅壽怨浮雲之慘顏爾乃永眺無見端居不聊愴
歸軒之寂寂傷遠客之悠悠月臨城曉風送邊秋
聞兮烟不寐凝笳動兮此夜愁及夫寒野蕭
條空山寂寥自鄢郢而途眇指邯鄲而路遙傷永
離兮浦曲訣遠送兮河橋眺平蕪之漫漫瞻遠樹
之迢迢仡然直視嗑矣魂銷形將槁木同植心與
飛蓬共飄至如隴上從軍漢陽謫戍挿羽朝急要

鞭夜赴黢黢寒雲蒼蒼關樹甘埋影於異域
夔回首於歸路魂逝兮邑里目斷兮煙霧步將前而復
畱望欲罷而還顧都驚塵之歛起見征羽之將度
泉石愴而增咽行人悲而失措亦有擣衣思婦織
錦從人看粉黛兮無色視桃李兮非春君去兮還
無期妾心兮私自悲高臺四望無極天天涯一去
何時盡 天涯兮綿綿問道路兮將幾千朝朝暮
暮綺窓前長懷此恨終永年若夫羈旅失職之人
放逐流離之客羗抱恨而誰訴塊緘愁而不懌於
是窮澤際天滄流拂漢屬榮悴兮時改遇炎涼兮

節換莫不瞻草木而孤絕向風煙而永歎故夫望
之爲體也使人慘悽伊鬱惆悵不平興發思慮震
蕩心靈其始也罔兮若有求而不致也悵乎若有
待而不致也悠悠揚揚似出天壤而涉雲莊遂遂
巡巡若失其手而忘其真群感方興衆念始并旣
情招而思引亦目受而心傾浩兮漫兮終遇遠兮
肆兮流兮宕不返兮然後精迴魄亂神飛志否憂
憤總集莫能自止雖剛悍武力之夫法度禮容之
志孰不解夫剛毅廢綱遺紀衍借使 河負海牛
山之美可遊左江右湖京臺之樂難忘

金石悲兮綺羅傷顧山川以永慨邈千秋而詎央
若乃羊公惻愴於峴山孔宣憫默於曲阜王生臨
遠而沮氣頽子登高而白首惟夫作聖明哲寬和
敦厚亦復怛色愀容喪精虧壽故望之感人深矣
而人之激情至矣必也念終懷始感徃悲來沿末
形 至造思繫無而生哀此懽娛者所以易情而
慷慨達識者所以疑慮而徘徊者也

五言古詩

秋山望月酬李騎曹

愁客坐山隈懷抱自悠哉況復高秋夕明月正徘徊

徊亭亭出廻岫皎皎映層臺色帶銀河滿光含玉
露開淡雪籠影度虛暈抱輪迴谷邃涼陰靜山空
夜響哀寒催數鴈急風送一螢來獨軫離君恨遙
想故人杯

晚秋喜雨 并序

咸亨元年自四月不雨至秋九月王畿之內嘉穀
不滋君子小人惶惶如也天子慮深求瘼念在責
躬避寢損膳錄寃施役牲幣之禮遍於神祇鐘庾
之貸周於窮乏至誠斯盛靈輿有融爰降甘澤大
拯炎亢朝庭公卿相趨動色里閭昨庶謳吟成響

年和俗阜於焉可致撫事形言孰云能已乃詩曰
積陽纏首夏隆旱屆徂秋炎威振皇服敲景暴神
州氣滌朝川朗光澄夕照浮草木委林甸禾黍悴
原疇國懼流金生人深懸磬憂紫宸兢履薄丹宸
念推溝望肅壇場祀寃申囹圄囚御車遷玉殿薦
菲撤瓊羞濟窘邦儲發蠲窮井賦優服閒雲驥屏
冗術土龍修睿感通三極天誠貫六幽夏祈良未
擬商禱詎爲儔穴蟻禛符應山蛇毒影收騰雲八
際滿飛雨四溟周聚霽籠仙闕連霏繞畫樓旱陂
仍積水涸沼更通流映穗萎還結寒苗瘁復抽九

李嶠集卷上
五
農歡歲阜萬寓慶時休野洽如坻詠途喧擊壤謳
幸聞東李道欣奉北塲遊

奉教追赴九成宮途中口號

委質承仙翰祇命遄搖策事偶從梁遊人非背淮
客長驅歷川阜迴眺窮原澤鬱鬱桑柘繁油油禾
黍積雨餘林氣靜日下山光夕未攀叢桂巖猶倦
飄蓬陌行當奉麾蓋慰此勞行役

和同府李祭酒休沐田居

列位簪纓序隱居林野躅徇物爽全直棲真昧均
俗若人兼吏隱率性夷榮辱地籍朱邱基家在青

山足斲弭西園蓋言事東臯粟築室俯澗濱開扉
面巖曲庭幽引夕霧簷迴通晨旭迎秋谷黍黃含
露園葵綠勝情狎蘭杜雅韻鏘金玉伊我懷丘園
願心從所欲

扈從還洛呈侍從羣官

四海帝王家兩都周漢室觀風昔來幸御氣今旋
蹕雷奮六合開天行萬乘出玄冥奉時駕白矩參
戎律後隊咽笳聲前驅嚴罕畢輝光射東井禁令
橫西秩帳殿別陽春旌門臨甲乙將交洛城雨稍
遠長安日邛鞮雲外來咸秦霧中失孟冬霜霰下

是日農功畢天道向歸餘皇情美陰隲行在名嶽
禮迺問高年疾祝鳥旣開羅調人更張瑟登源采
謳誦俯谷求才術邑罕懸磬貧山無掛瓢逸施恩
浹寰宇展義該文質德澤盛軒游哀衿深禹恤申
歌地廬駭獻壽衢罇溢瑞色抱氤氲寒光變蕭颺
宗枝旦奭輔侍從王劉疋並緝蛟龍書同簪鳳皇
筆陶甄荷吹萬頌歎歸明一歡與道路長顧隨談
笑密叨承廊廟選謬齒夔龍弼喜構大厦成慙非
隆棟吉

奉使築朔方六州城率爾而作

奉詔受邊服總徒築朔方驅彼犬羊族正此戎夏
疆子來多悅豫王事寧怠遑三旬無愆期百雉鬱
相望雄視沙漠垂有截北海陽二廷已頓顙五嶺
盡來王驅車登崇墉顧眄凌大荒千里何蕭條草
木自悲涼憑軾訊古今慨焉感興亡漢障緣河遠
秦城入海長顧無廟堂策貽此中夏殃遁隱前業
衰運開今化昌制爲百王式舉合千載防馬牛被
路隅鋒鏑銷戰場豈不懷殆勞所圖在永康王車
何爲者稱代陳頌章

早發苦竹館

合沓巖嶂深朦朧烟霧曉荒阡下樵客野猿驚山
鳥開門聽潺湲入徑尋窈窕栖颯抱寒木流螢飛
暗篠早霞稍霏霏殘月猶皎皎行看遠星稀漸覺
游氛少我行撫輶傳兼得傍林沼貪翫水石奇不
知川路渺徒憐野心曠詎惻浮年小方解寵辱情
求託累塵表

安輯嶺表事平罷歸

雲端想京縣帝鄉如可見天涯望越臺海路幾悠
哉六月飛鵬去三年瑞雉來境遙銅柱出山險石
門開自我違瀍洛瞻途屢揮霍朝朝寒露多夜夜

征衣薄白簡承朝憲朱方撫夷落旣弘天覆廣且
諭皇恩溥皇恩溢外區憬俗詠來蘇聲朔臣天子
壇場拜老夫絳宮韜將畧黃石寢兵符返旆收龍
虎空營集鳥鳥日落澄氛藹憑高視衿帶東甌抗
千越南斗臨吳會春色遶邊陲飛花出荒外卉服
紛如積長川思遊客風生丹桂晚雲起蒼梧夕去
軸艤清江歸軒趨紫陌衣裳會百蠻琛賫委重關
不學金刀使空持寶劍還

七言古詩

寶劍篇

吳山開越溪涸三金合冶成寶鏐淬綠水鑿紅雲
五采焰起光氛氲背上名爲萬年字胸中點作七
星文龜甲參差白虵色輒轡宛轉黃金飾文犀中
斷寧方利駿馬群駢未擬直風霜凜凜匣上青精
氣遙遙斗間明避災朝穿晉帝屋逃亂夜入楚王
城一朝運偶逢大仙虎吼龍鳴騰上天東谷顯昇
紫微座西王佩下赤城田承平久息干戈事僥倖
得充文武備除災辟患宜君王益壽延齡後天地

汾陰行

君不見昔日西京全盛時汾陰后土親祭祠齋宮

宿寢設儲供撞鐘鳴鼓樹羽旌漢家四葉才且雄
賓延萬靈服九戎栢梁賦詩高宴罷詔書法駕幸
河東河東太守親掃除奉迎至尊導鑾輿五營夾
道列容衛三河縱觀空里閭迴旌駐蹕降靈場焚
香奠醑邀百祥金鼎發食正焜煌靈祇煒煒攄景
光埋玉陳牲禮神畢舉麾上馬乘輿出彼汾之曲
嘉可遊杏蘭爲檝桂爲舟棹歌微吟綵鷁遊簫鼓
哀鳴白雲秋歡娛宴洽賜群后家家復除戶牛酒
聲名動天樂無有千秋萬歲南山壽自從天子向
秦關玉輦金輿不復還珠簾羽帳長寂寞鼎湖龍

李嶠集卷上
九
髯安可攀千齡人事一朝空四海為家此路窮雄
豪意氣今何在壇場官館盡蒿蓬路逢故老長歎
息世事回還不可測昔時青樓對歌舞今日黃埃
聚荆棘山川滿目淚沾衣富貴榮華能幾時不見
只今汾水上唯有年年秋鴈飛

擬古東飛百勞西飛鷺

傳書青鳥迎簫鳳巫嶺荆臺數通夢誰家窈窕住
園樓五馬千金照陌頭羅裙玉珮當軒出點翠施
紅競春日佳人二八盛舞歌羞將百萬呈雙娥庭
前芳樹朝夕改空駐妍華欲誰待 李嶠集卷上

李嶠集卷中

五言律詩

日

旦出扶桑路遙升若木枝雲間五色滿霞際九光
披東陸蒼龍駕南郊赤羽馳傾心比葵藿朝夕奉
光曦

月

桂滿三五夕莫分二八時清輝飛鵲鑑新影學蛾
眉皎潔臨踈牖玲瓏鑿薄帷願言從愛客清夜幸
同嬉

星

蜀郡靈槎轉豐城寶氣新將軍臨北塞天子入西秦未作三台輔寧爲五老臣今宵潁川曲誰識聚賢人

風

落日生蘋末搖颺徧遠林帶花迎鳳舞向竹似龍吟月動臨秋扇松清入夜琴蘭臺宮殿峻還拂楚王襟

雲

英英大梁國郁郁秘書臺碧落從龍起青山觸石

來官名光邃古蓋影耿輕埃飛感高歌發威加四海迴

煙

瑞氣凌青閣空濛上翠微迥浮雙闕路遙拂九仙衣桑柘迎寒色松篁暗晚暉還當紫霄上時接彩鸞飛

露

滴瀝明花苑歲蕤泫竹叢玉垂丹棘上珠湛綠荷中夜警千年鶴朝零七月風願凝仙掌內長奉未央宮

霧

曹公迷楚澤漢帝出平城
涿野妖氛靜丹山霽色
明類煙方稍重方雨散
還輕倘入非熊繇寧思
玄豹情

雨

西北雲膚起東南雨足來
靈童出海見神女向日
迴斜影風前合圓文水
上開十旬無破塊九土
信康哉

雪

瑞雪驚千里彤雲暗九霄
龍沙飛正遠玉馬地還

銷逐舞花先動臨歌扇影
飄大周天闕路今日海
神朝

山

地鎮標神秀峨峨上翠氛
泉飛一道帶峰出半天
雲古壁丹青色新花綺繡
紋已開封禪所希謁聖
明君

石

宗子維城固將軍飲羽威
巖花鑑裏發雲葉錦中
飛入宋星初墮過湘鸞
早歸倘因特補極寧復
想支機

原

王粲銷憂日江淹起恨年帶川遙綺錯分隰迥阡
眠橫周甸莓苔闕晉田方知急難響長在鶴
鴿篇

野

鳳出秦郊迥鶉飛楚塞空蒼梧雲影去涿鹿霧光
通草暗少原綠花明入蜀紅誰言板築士猶處傳
巖中

田

貢禹懷書日張衡作賦辰杏花開鳳吟菖葉布龍

麟瑞陌兩岐秀嘉禾同穎新寧知帝皇力擊壤自
安貧

道

銅駝分鞏洛劍閣抵臨邛紫微三千里青樓十二
重玉關塵似雪金穴馬如龍今日中衢上堯罇更
可逢

海

習坎䟽丹壑朝宗合紫微三山巨鼇湧九萬大鵬
飛樓寫青雲色珠含明月輝會因添霧露方逐衆
川歸

江

日夕三江望靈朝萬里迴霞津錦浪動月浦練花
開湍似黃牛去濤如白馬來英靈已傑出誰識卿
雲才

河

源出崑崙中長波接漢空桃花來馬頰竹箭入龍
宮德水千年變榮光五色通若披蘭葉檢

洛

九洛韶光媚三川物候新花明丹鳳浦日映玉鷄

津元禮期仙客陳王覩麗人神龜方錫瑞綠字仲
來臻

蘭

虛室重招尋忘言契斷金英浮漢家酒雪儷楚王
琴廣殿輕香發高臺遠吹吟河汾應擢秀誰肯訪

山陰

菊

玉律三秋暮金精九日開榮舒洛媛浦香泛野人
杯霍靡寒潭側丰茸曉岸隈黃花今日晚無復白
衣來

竹

高籀楚江濱
嬋娟含曙氛
白花搖鳳影
青節動龍文
葉掃東西日
枝梢西北雲
誰知湘水上
流淚獨思君

藤

吐葉依松磴
舒苗長石臺
神農嘗藥罷
質子寄書來
色映蒲萄架
花分竹葉杯
金隄不見識
玉潤幾重開

萱

屣步尋芳日
忘憂自結叢
黃英開養性
綠葉正依

籠色湛先人
露香傳少女
風還依北堂
下曹植動文雄

茅

楚甸供王日
衡陽入貢年
麇包青野外
鷗嘯綺楹前
堯帝成茨罷
殷湯祭雨旋
方期大君錫
不懼小巫捐

荷

新溜滿澄陂
圓荷影若規
風來香氣遠
日落蓋陰移
魚戲排緗葉
龜浮見綠池
魏朝難接採
楚服但同披

萍

二月虹初見三春蟻正浮青蘋含吹轉紫帶帶波
流屢逐明神薦常隨旅客遊既能甜似蜜還造楚
王舟

菱

鉅野韶光暮東平春溜通影搖江浦月香引棹歌
風日色翻池上潭花發鑑中五湖多賞樂千里望
難窮

瓜

欲識東陵味青門五色瓜龍蹄遠珠履女臂動金

花六子方呈瑞三僊實可嘉終朝奉絺綌謁帝佇
非賒

松

鬱鬱高巖表森森幽澗陲鶴棲君子樹風拂大夫
枝百尺條陰合千年蓋影披歲寒終不改多節幸
君知

桂

未植銀宮裏寧移玉殿幽枝生無限月花滿自然
秋俠客條爲馬仙人葉作舟願君期道術攀折可
淹留

槐

暮律移寒火春宮長舊栽葉生馳道側花落鳳庭隈
烈士懷忠觸鴻儒訪業來何當赤墀下疎幹擬
三台

柳

楊柳鬱氤氳金堤總翠氛庭前花類雪樓際葉如雲
列宿分龍影芳池寫鳳文短簫何以奏攀折爲
思君

桐

孤秀嶧陽岑萋萋出衆林春光襍鳳影秋月弄圭

鳴琴
陰高映龍門迥雙依玉井深不因將入爨誰爲作

桃

獨有成蹊處穠華發井旁山風凝笑臉朝露泣啼粧
隱士顏應改仙人路漸長還欣上林苑千歲奉
君王

李

潘嶽閑居日王戎戲陌辰蝶遊芳徑馥鶯轉弱枝
新葉暗青房晚花明玉井春方知有靈幹時用表
真人

梨

擅美玄光側傳芳瀚海中鳳文踈象郡花影麗新
豐色對瑤池紫甘依大谷紅若令逢漢主還冀識
張公

梅

大庾歛寒光南枝獨早芳雪含紫花色風引上春
香粧面迴青鏡歌塵起畫梁若能遙止渴何假泛
瓊漿

橘

萬里盤根植千株布葉繁旣榮潘子賦方重陸生

言玉藹含霜動金衣逐吹翻願辭湘水曲長茂上
林園

鳳

有鳥居丹穴其名曰鳳凰九苞應靈瑞五色成文
章屢向秦樓側頻過洛水陽鳴岐今日見阿閣佇
來翔

鶴

黃鶴遠聯翩從鸞下紫煙翱翔一萬里來去幾千
年已憇青田側時遊丹禁前莫言空警露猶冀一
聞天

鳥

日落朝飛急霜臺夕影寒聯翩依月樹迢遞遶風
竿白首何年改青禽此夜彈靈臺如可託千里向
長安

鵲

不分荆山抵甘從石印飛危巢畏風急繞樹覺星
稀喜逐行人至愁隨織女歸儻遊明鑑裏朝夕動
光輝

鴈

春輝滿朔方候鴈發衡陽望月驚弦影排雲結陣
行往還倦南北朝夕苦風霜寄語能鳴侶相隨入
帝鄉

鳧

颯沓睢陽渙浮遊漢水隈錢飛入井見鶴引入琴
哀降將貽詩罷王喬曳舄來何當歸太液翔集動
成雷

鷺

睨睨度花紅闌闌亂曉空乍離幽谷日先轉上林
風翔集春臺側低昂錦帳中聲詩辨博忝比興思
無窮

雉

白雉振朝聲飛來表太平楚郊疑鳳出陳寶若鷄
鳴童子懷仁至中郎作賦成冀君看飲啄取介獨
含情

燕

天女同辰至玄衣澹碧空差池沐時雨頡頏舞春
風相賀雕欄側雙飛翠幕中忽驚留爪去猶冀識
吳宮

雀

大厦初成日嘉賓集杏梁對書表周瑞入幕應王

祥暮宿江城裏朝遊漣水傍願齊鴻鵠志希逐鳳
凰翔

龍

銜燭耀幽都含章擬鳳雛西秦飲渭水東洛薦河
圖帶火移星陸騰雲出鼎湖希逢聖人步庭闕正
晨趨

麟

漢祀應祥開魯郊西狩迴奇音中鍾呂成角喻英
才畫像臨仙閣藏書入帝臺若驚能吐哺為覩鳳
凰來

象

鬱林開郡畢維揚作貢初萬推方演楚惠子正焚
書執燧奔吳戰量舟入魏墟六牙行致遠千葉奉

高居

馬

天馬本來東嘶驚御史駸蒼龍遙逐日紫鷲迥追
風明月來鞍上浮雲落蓋中得隨穆天子何假唐
成公

牛

高歌初入相燕陣早橫功欲向桃林下先過梓樹

中在吳頻喘月奔夢屢驚風不用五丁士如何九

折通

豹

車法肇宗周麗文闡大猷還將君子變來蘊太公
誅委質超羊鞞飛名列虎侯若令逢雨露長隱南

山幽

熊

導洛宜陽古乘春別館前昭儀忠漢日太傅翊周
年列射三侯滿興師七步旋莫言舒紫褥猶異飲
清泉

鹿

涿鹿開中冀秦原闢帝畿柰花開舊苑萍葉藹前
詩道士乘仙日先生折角時方懷丈夫志抗首別
心期

羊

絕飲懲澆浴行驅夢逸材仙人擁石去童子馭車
來夜玉含星動晨氈映雪開莫言鴻漸力長牧上
林隈

兔

上蔡應初擊平岡遠不稀目隨槐葉長形逐桂條

飛漢月澄秋色梁園映雪輝唯當感純孝郭郭引
兵威

城

四塞稱天府三河建浴都飛雲藹層闕白日麗南
隅獨下仙人鳳群驚御史烏何辭一萬里邊檄悍
匈奴

門

奕奕彤闈下煌煌紫禁隈阿房萬戶列閭闔九重
開踈廣遺榮去于公待駟來詎知金馬側方朔有
奇才

市

闐闐門三市旗亭起百尋漸離初擊筑司馬正彈
琴細柳龍鱗映長槐兔月陰徒知觀衛玉詎肯掛
秦巾

井

玉甃談仙客銅臺賞魏君蜀都宵映火杞國旦生
雲向日蓮花淨含風李樹薰已開千里國還聚五
星文

宅

寂寂蓬蒿徑喧喧湫溢廬屢逢長者轍時引故人

車孟母遷鄰罷將軍辭第初誰憐草玄處獨對一
牀書

池

絲棹浮太液清觴醉習家詩情對明月雲曲拂流
霞烟散龍形淨波含鳳影斜安仁動秋興魚鳥思
空賒

樓

百尺重城際千尋大道隈漢宮井幹起吳國落星
開笛怨綠珠去簫隨弄玉來銷憂聊假日誰識仲
宣才

橋

烏鵲填應滿黃公去不歸勢疑虹始見形似鴈初
飛妙應七星制高分半月輝秦王空構石仙島遠
難依

舟

征棹三江暮連檣萬里迴相烏風際轉畫鷁浪前
開羽客乘霞至仙人弄月來何當同傳說特展巨
川材

車

天子馭金根蒲輪闢四門五神趨雪至雙轂似雷

奔丹鳳棲金轄非熊載寶軒無階忝虛古珠乘奉
王言

牀

傳聞有象牀疇昔獻君王玳瑁千金起珊瑚七寶
粧桂筵含栢馥蘭席拂沉香願奉羅帷夜長承秋
月光

席

避坐承宣父重筵揖戴公桂香浮半月蘭氣襲回
風舞拂丹霞上歌清白雪中佇將文綺色舒卷帝
王宮

帷

久閉先生戶高褰太守車羅將翡翠合錦逐鳳凰
舒明月彈琴夜清風入幌初方知決勝策黃石受
兵書

簾

清風時入燕紫殿幾含秋曖曖籠靈閣纖纖上玉
鈎窓中翡翠動戶外水晶浮巧作盤龍勢長迎飛
燕遊

屏

洞徹琉璃蔽威紆屈膝迴錦中雲母列霞上織成

開山水含春動神仙倒景來修身兼竭節誰識作
銘才

被

桂友尋東閣蘭交聚北堂象筵分錦繡羅薦合鴛
鴦光逸偷眠穩王章泣恨長孔懷欣共寢棣萼幾
含芳

鑑

明鑑掩塵埃含情照魏臺日中烏鵲至花裏鳳凰
來玉彩疑冰澈金輝似月開方知樂彥輔自有鑒
人才

扇

翟羽舊傳名蒲葵價不輕花芳不滿面羅薄詎障
聲禦熱含風細臨秋帶月明同心如可贈特表合
歡情

燭

兔月清光隱龍盤畫燭新三星花入夜四序玉調
晨浮炷依羅幌吹香匝綺茵若逢燕國相特用舉
賢人

酒

孔坐洽良儔陳筵幾獻酬臨風竹葉滿湛月桂香
浮每接高陽宴長陪河朔遊會從玄石飲雲雨出

圓丘

李嶠集卷中

吳時用書黃
周賢金賢刊

李嶠集卷下


五言律詩

經

漢室鴻儒盛鄒堂大義明五千道德闡三百禮儀
成青紫方拾芥黃金徒滿籬誰知懷逸辯重席冠
群英

史

馬記天官設班圖地理新善談方疊疊青簡見彬
彬方朔初聞漢荆軻昔向秦正辭堪載筆終冀作
良臣



詩

都尉仙鳧遠梁王駟馬來扇中紈素製機上錦紋
廻天子三章傳陳王七步才緇衣久擅美祖德信
悠哉

賦

布義孫卿子登高楚屈平銅臺初下筆樂觀正飛
纓乍有凌雲勢時聞擲地聲造端長體物無復大
夫名

書

削簡龍文見臨池鳥跡舒河圖八卦出洛字九疇

初垂露春光滿崩雲骨氣餘請君看入木一寸乃
非虛

檄

羽檄本宣明由來木聲聯翩至漢國迢遞入燕
營毛義持書去張儀韞璧行曹風雖覺愈陳草始
知名

紙

妙跡蔡侯施芳名古伯馳雲飛錦綺落花發縹紅
披舒卷隨幽顯廉方合軌儀莫驚反掌字當取葛
洪規

筆

握管門庭側含毫山水隈霜輝簡上發錦字夢中
開鸚鵡擒文至麒麟絕句來何當遇良史左右振
奇才

硯

左思裁賦日王充作論年光隨錦文發形帶石巖
圓積潤循毫裏開池小學前君苗徒見藝誰詠士
衡篇

墨

長安分石炭上黨結松心遶畫繩初落含滋綬更

深悲絲光易染疊素彩還沉別有張芝學書池幸
見臨

劍

我有昆吾劍求趨夫子庭白虹時切玉紫氣夜干
星鏑上芙蓉動匣中霜雪明倚天持報國畫地取
雄名

刀

列辟鳴鸞至惟良珮犢旋帶環疑寫月引鑑似含
泉入夢華梁上含鋒彩筆前莫驚開百鍊特擬定
三邊

箭

漢甸初收羽燕城忽解圍影隨流水急光帶落星
飛夏列三成範堯沉九日輝斷蛟雲夢澤希爲識
忘歸

彈

俠客持蘇合佳游滿帝鄉避丸深可謂求多遂難
忘金迸疑星落珠成似月光誰知少孺子將此諫
吳王

弩

挺質本軒黃申威振遠方機張驚雉雒玉彩耀星

芒高鳥行應盡清猿坐見傷蘇秦六百步持此說
韓王

旗

桂影承宵月虹輝接曙雲縱橫齊八陣舒卷引三
軍日薄蛟龍影風翻鳥隼文誰知懷勇志蟠地幾
續紛

旌

告善康莊側求賢市肆中擁麾分彩雉持節曳丹
虹影麗天山雪光搖朔塞風方知美周政抗旆賦
車攻

戈

富父春喉日殷辛漂杵年曉霜含白刃落影駐雕
鋌夕擯金門側朝提玉塞前願隨龍影度橫陣
雲邊

鼓

舜日諧鼗響堯年韻土聲向樓疑吹擊震谷似雷
驚仙鶴排門起靈鼉帶水鳴樂云行已奏禮日冀
相成

弓

桃文稱辟惡桑質表初生宛轉雕鞬際依稀半月
明遙響落鴈影虛引怯猿聲徒切烏號思攀龍逐
不成

琴

隱士竹林隈英聲寶匣開風前綠綺弄月下白雲
來淮海多為室梁氓舊作臺子期如可聽山水響
餘哀

瑟

伏羲初製法素女昔傳名流水嘉魚躍叢臺舞鳳
驚嘉賓飲未極君子娛俱并倘入丘之戶應知由
也情

琵琶

朱絲聞岱谷鑠質本多端半月分絃出叢花拂面
安將軍曾制曲司馬屢陪觀本是胡中樂希君馬
上彈

箏

蒙恬芳軌設遊楚妙彈開新曲帳中發清音指下
來鈿裝模六律柱列配三才莫聽西秦奏箏箏有
剝哀

鐘

既接南陵磬還隨北里笙平陵通曙響長樂警宵
聲秋至含霜動春歸應律鳴欲知常待扣金篴有
餘清

簫

虞舜調清管王褒賦雅音參差橫鳳翼搜索動人
心

笛

羌笛寫餘聲長吟入夜清關山孤月下來向隴頭
鳴逐吹梅花落含春柳色驚行觀向子賦坐憶舊
隣情

笙

懸匏曲沃上孤篠汶陽隈形寫歌鸞翼聲隨舞鳳
哀歡娛分北里純孝即南陔今日虞音奏蹒蹒鳥
獸來

歌

漢帝臨汾水周仙去洛濱郢中吟白雪梁上繞飛
塵響發行雲駐聲隨子夜新願君聽扣角當自識
賢臣

舞

紗伎遊金谷佳人滿石城霞衣席上轉花袖雪前

明儀鳳諧清曲迴鸞應雅聲非君一顧重誰賞素
腰輕

珠

燦爛金輿側玲瓏玉殿隈昆池明月滿合浦夜光
迴彩逐靈蛇轉形隨舞鳳來甘泉宮起罷花媚望
風臺

玉

映石先過魏連城欲向秦洛陽陪勝友燕趙類佳
人方水晴虹媚常山瑞馬斯徒為卞和識不遇楚
王珣

金

南楚標前貢西秦識舊城祭天封漢嶺擲地警孫
聲向日披沙淨含風振鐸鳴方同楊伯起獨有四
知名

銀

思婦屏輝掩遊人燭影長玉壺初下箭桐井共安
牀色帶長河色光浮滿月光靈山有珍甕仙闕薦
君王

錢

漢日五銖建姬年九府流天龍帶泉寶地馬列金

溝趙壹囊初乏何曾著欲收金門應入論玉井與
來求

錦

漢使巾車遠河陽步陣陳雲浮仙石日霞滿蜀江
春機迥迴文巧紳兼束髮新若逢楚王貴不作夜
行人

羅

妙舞隨裙動行歌入扇清蓮花依帳發秋月鑒帷
明雲薄衣初捲蟬飛翼轉輕若珍三代服同擅綺
純名

綾

金縷通秦國爲裘指魏君落花遙寫霧飛鶴近圖
雲馬眼冰陵影竹根雪霰文何當畫秦女煙際坐

素

女織腰洛浦妃

遠方望鴈足上林

飛妙奪鮫綃色光騰月扇輝非君下路去誰賞故
人機

布

御績創羲黃緇冠表素王瀑飛臨碧海火浣擅炎

華芳
方孫被登三相劉衣闡四方佇因春斗粟來曉棣

寒食清明早赴王門率成

遊客趨梁邸朝光入楚臺槐煙乘曉散榆火應春
開日帶晴虹上花隨早蝶來雄風乘令節餘吹拂
輕灰

侍宴甘露殿

月宇臨丹地雲牕網碧紗御筵陳桂醕天酒酌榴
花水向浮橋直城連禁苑斜承恩恣歡賞歸路滿
煙霞

奉和春日遊苑喜雨應制

仙蹕九重臺香煙萬壽杯
一旬初降雨二月早聞
雷葉向朝濟密花含宿潤
開幸承天澤豫無使日
光催

奉和七夕兩儀殿會宴應制

靈匹三秋會仙期七夕過
查來人泛海橋渡鵲填
河帝縷升銀開天機罷玉梭
誰言七襄詠重入五
絃歌

立春日侍宴內殿出剪綵花應制

幸欲聞年至剪綵學方辰
綴綺奇能似裁紅巧過

真花從篋裏發葉向手中春
不與韶光競何名天
上人

春日侍宴幸芙蓉園應制

年光竹裏遍春色杏間遙煙氣籠青閣
流文蕩盡
橋飛花隨蝶舞艷曲伴鸞嬌今日陪歡豫
還疑陟
紫霄

中宗降誕日長定公主滿月侍宴

神龍見像日仙鳳養雛年
大火乘天正明珠對月
圓作新金篋裏歌奏玉筐前
今日宜孫慶還叅祝
壽篇

奉和驪山高頂寓目應制

步輦陟山巔山高入紫煙忠臣還捧日聖后欲捫
天迴識平陵樹低看華嶽蓮帝鄉應不遠空見白
雲懸

和周記室從駕曉發合璧宮

濯龍春苑曙翠鳳曉旗舒野色開煙後山光澹月
餘風長笳響咽川迴騎行踈珠履陪仙駕金聲振
屬車

奉和春日遊苑喜雨應制

園樓春正歸入苑弄芳菲密雨迎仙步低雲拂御

衣危花露易落度鳥濕難飛膏澤登千庾歡情遍
九圍

奉和人日清蹕閣宴群臣遇雪應制

三陽偏勝節七日最靈辰行慶傳芳蟻升高綴綵
人堦前冀候月樓上雪驚春今日銜天造還疑上
漢津

侍宴長寧公主東莊應制

別業臨青甸鳴鑾降紫霄長筵鴛鷺集仙管鳳凰
調樹接南山近煙含北渚遙承恩咸已醉戀賞未
還鑣

閏九月九日幸總持登浮圖應制

閏節開重九真遊下大千花寒仍薦菊座晚對披
蓮利鳳迴雕輦幡虹間綵旃還將西梵曲助入南
薰絃

幸白鹿觀應制

駐蹕三天路迴旃萬仞溪真庭群帝饗洞府百靈
棲玉酒仙壚釀金方暗壁題佇看青鳥入還陟紫
雲梯

和杜侍御太清臺宿直旦有懷

貂冠朝彩振烏署曉光分欲嘯遷喬侶先飛擲地

文庭虛麥雨潤林靜蕙風薰稽駕終難仰梁鳧且
自群

和杜學士江南初霽羈懷

大江開宿雨征棹下春流霧卷晴山出風恬晚浪
收岼花明水樹川鳥亂沙洲羈眺傷千里勞歌動
四愁

酬杜五弟晴朝獨坐見贈

平分坐虛館曠望幾悠哉宿霧分空盡朝光度隙
來影低藤架密香動藥欄開未展山陽會空留池
上杯

晚景悵然簡二三子

楚客愁悲動梁臺夕望賒梧桐稍下葉山桂欲開
花氣引迎寒露光收向晚霞長歌白水曲空對綠
池華

送李邕

落日荒郊外風景正淒淒離人席上起征馬路傍
嘶別酒傾壺贈行書掩淚啼殷勤御溝水從此各
東西

又送別

岐路方爲客芳樽暫解顏人隨轉蓬去春伴落梅

還白雲渡汾水黃河繞晉關離心不可問宿昔鬢
成班

馬武騎挽歌二首

五日皆休沐三泉獨不歸池臺金闕是樽酒瑋筵
非巷靜遊禽入門閒過客稀唯餘昔年鳳尚繞故
樓飛

昔下天津館嘗過帝子家夜傾金屋酒春舞玉臺
花試馬依紅埽吹蕭弄紫霞誰言東郭路翻枉北
門車

武三思挽歌

玉匣金為縷銀鈎石作銘短歌傷薤曲長暮泣松
扃事往昏朝霧人亡折夜星忠賢良可惜圖畫入
丹青

天官崔侍郎夫人盧氏挽歌

寵服當年盛芳魂此地窮劍飛龍匣在人去鵲巢
空簾愴孤生竹琴衰伴死桐唯當青史上千載仰
嬪風

遊禁苑幸臨渭亭遇雪應制

同雲接野煙飛雪暗長天拂樹添梅色過樓助粉
妍光含班女扇韻入楚王絃六出迎仙藻千箱答

瑞年

五言排律

奉和幸薦福寺應制

鴈沼開香域鶯林降采旃還窺圖鳳宇更坐濯龍
川桂輦朝群辟蘭宮列四禪半空銀閣斷分砌寶
繩連甘雨樵蘇澤慈雲動沛篇獨慙賢作礪空喜
福成田

奉和幸長安故城未央宮應制

舊宮賢相築新苑聖君來運改城隍變年深棟宇
摧後池無復水前殿久成灰莫辨祈風觀空傳承

露杯宸心千載合睿律九韶開今日聯章處猶疑
上栢臺

皇帝上禮撫事述懷

配極輝光遠承天顧託隆負圖濟多難脫屣歸成
功聖道昭永錫邕言讓在躬還推萬方重咸仰四
門聰恭已忘自逸因人體至公垂旒滄海晏解網
法星空雲散天五色春來日再中稱觴合纓弁率
舞應絲桐凱樂深居鎬傳歌盛飲豐小臣濫簪筆
無以頌唐風

奉和天樞成宴夷夏群寮應制

轍迹銘西奔勲庸紀北燕何如萬方會頌德九門
前的的臨黃道迢迢入紫煙仙盤正下露高柱欲
承天山類叢雲起珠疑大火懸聲流塵作劫業固
海成田帝澤傾堯酒宸歌掩舜絃欣逢下生日還
覩上皇年

奉和拜洛應制

七萃鑾輿動千年端檢開文如龜負出圖似鳳銜
來殷薦三神享明禋萬國陪周旗黃鳥集漢幄紫
雲迴日暮鈞陳轉清歌上帝臺

奉和幸韋嗣立山莊侍宴應制

南洛師臣契東巖王佐居幽情遺綬冕宸眷屬樵
漁制下峒山蹕恩廻灞水輿松門駐旌蓋薜幄引
簪裾石磴平黃陸煙樓半紫虛雲霞仙路近琴酒
俗塵踈喬木千齡外懸泉百丈餘崖深經鍊藥穴
古舊藏書樹宿搏風鳥池潛縱壑魚寧知天子貴
尚憶武侯廬

奉和幸望春宮送朔方總管張仁亶

玉塞征驕子金符命老臣三軍張武旆萬乘餞行
輪猛氣陵玄朔崇恩降紫宸投醪還約士辭第本
忘身露下鷹初擊風高鴈欲賓方銷塞北夜還靜

漠南塵

奉和幸三會寺應制

故臺蒼頡里新邑紫泉居歲在開金寺時來降玉
輿龍形雖起利鳥跡尚留書竹是蒸青外池仍點
墨餘天文光聖草寶思合真如謬奉千齡日忻陪
十地初

劉侍讀見和山邸篇什重申此贈

神嶽瑤池圃仙宮玉樹林垂時警天御清暑滌宸
襟梁駕陪玄賞溜庭掩翠岑對巖龍岫出分壑鳳
池深簷迥松蘿映窻高石鏡臨落泉奔澗響驚吹

助猿吟野氣迷涼燠山花雜古今英藩盛賓侶勝
境相招尋踐徑披蘭葉攀崖引桂陰穆生時泛醴
鄒子或調琴雉翳分場合魚鈎向浦沉朝遊極斜
景夕宴待橫參顧已慙鉛鐔叨名齒璫簪暫依朱
邸館還暢白雲心丘壑信多美煙霞得所欽寓言
攄宿志竊吹簡知音漿價踰珍石酬文重振金方
從仁智所攜手濯清潄

和杜學士旅吹淮口阻風

夕吹生寒浦清淮上暝潮迎風欲舉棹觸浪反停
橈淼漫煙波闊參差林岸遙日沉丹氣斂天敞白
雲銷水鴈銜蘆葉沙鳧隱荻苗客行殊未已川路
幾迢迢

田假限疾獲還莊載想田園兼思親友贈

杜幽素

游宦勞牽網風塵久化衣迹馳東苑路望阻北巖
扉及此棄休告聊將狎遁肥十旬俄委疹三逕且
外歸茂陵官難即靈臺暫可依疲痾旅城寺延想
屬郊畿夕夢園林是晨瞻邑里非綠疇良已穢清
濠曠不追野花何處落山月幾秋暉彼美符商政
優游絕漢機高情物累遣逸氣煙霞飛樂道方無

李嶠集卷下
悶懷賢獨有違樽虛舊園酒琴靜故人徼夏沼蓮
初發秋田麥稍稀何當携手去日暮採芳菲

送光祿劉主簿之洛

函谷雙嶂右伊川二陝東仙舟宵將隔方竿斲云
同朋席餘歡盡文房舊侶空他鄉千里月岐路九
秋風背櫂嘶班馬分洲叫斷鴻別後青山外相望
白雲中

送駱奉禮從軍

玉塞邊烽舉金壇廟略申羽書資銳筆戎幕引英
賓劍動三軍氣衣飄萬里塵琴樽畱別賞風景惜
入城闈

軍師凱旋自邕州順流舟中

鳴鞞入嶂口汎舸歷川湄尚想江陵陣猶疑下瀨
師岸迴帆影疾風逆鼓聲遲萍葉沾蘭槳林花拂
桂旗弓鳴蒼隼落劍動白猿悲芳樹吟羗管幽篁
入楚詞全軍多勝策無戰在明時寄謝山東妙長
纓徒自欺

夏晚九成宮呈同寮

碣館分襄野平臺架射峰英藩信煒燁勝地本從

容林引梧庭鳳泉歸竹沼龍小軒恒共處長坂屬
相從野席蘭琴奏山臺桂酒釀一枰移晝景六著
畫宵鐘枚藻清詞律鄒譚曜辨鋒結歡良有裕聯
案愧無庸慙悅丘中賞還希物外蹤風煙遠近至
鳥魚去來逢月澗潢千丈雲崖列萬重樹紅山果
熟崖綠水苔濃願以西園柳長間北巖松

王屋山第之側雜構小亭暇日與群公同

遊

桂亭依絕巘蘭榭俯回溪綺棟魚鱗出雕甍鳳羽
栖引泉聊漲沼鑿磴且通蹊席上山花落簾前野
樹低戈林開曙景釣渚發晴霓狎水驚梁鷓臨風
聽楚雞復看題柳葉彌喜蔭桐圭

七言律詩

奉和初春幸太平公主南莊應制

主家山第接雲開天子春遊動地來羽騎參差花
外轉電旌搖曳日邊迴還將石榴調琴曲更取峯
霞入酒杯鸞輅已辭烏鵲渚簫聲猶遶鳳凰臺

太平公主山亭侍燕

黃金瑞榜絳河隈白玉仙輿紫禁來碧樹青岑雲
外聳朱樓畫壁水中開龍舟下瞰鮫人室羽節高

臨鳳女臺遽惜歡娛歌吹晚揮戈更卻曜靈回
五言絕句

中秋月二首

盈缺青冥外東風萬古吹何人種丹桂不長出輪
枝

圓魄上寒空皆言四海同安知千里外不有雨兼
風

七言絕句

侍宴桃花園詠桃花應制

歲去無言忽顛顛時來含笑吐氛氲不能擁棹迷

仙客故欲開蹊待聖君

奉和聖製幸韋嗣立山莊應制

萬騎千官擁帝車八龍三馬訪仙家鳳凰原上窺
青壁鸚鵡杯中弄紫霞

遊苑遇雪

散漫祥雲逐聖迴飄颻瑞雪繞天來不能落後爭
飛絮故欲迎前定早梅

李嶠集卷下終



李嶠字巨山趙州贊皇人兒時夢人遺雙筆由是有文辭
弱冠擢進士第始調安定尉舉制策甲科武后時官鳳
閣舍人每有大手筆皆特命嶠為之思遷鸞臺侍郎知
政事封趙國公景龍中以特進守兵部尚書同中書門下
三品睿宗立出刺懷州明皇貶為滁州別駕改廬州嶠
富於才思初與王楊接踵中與崔蘇齊名晚諸人沒獨
為文章宿老一時學者取法焉

